

麗水縣志

卷十九

麗水縣志卷之九

人物一

史例非操行殊特者不得裁篇志乘則稍寬矣然或過爲藻績及以愛惡爲進退則昌黎所云必有天刑者豈僅屬之史職哉麗邑風尚樸魯載記寥寂子孫亦罕誣其先者哀所聞見核實書之文采所不敢言傳信其或庶爾

吳越

章德安處州麗水人累官至內都監文穆王寢疾察其忠厚能斷欲屬以後事語之曰宏佐尙少當擇宗人長者立之德安曰宏佐雖少羣下服其英敏願王勿以爲念王曰汝善輔之

麗水縣志

卷之九

人物

一

麗水啓明印刷所代印

吾無憂矣已而王薨內牙指揮使戴惲者與王養子宏侑比蓋宏侑養母惲妻之私親也或言惲謀立宏侑德安秘不發喪伏甲士於幕下殺惲廢宏侑爲庶人復其孫姓而幽之居無何上統軍使闞璠強而橫排斥異己忠獻王不能制德安數與之爭璠遂以計貶德安處州右都監

十國春秋

宋

王元字常侍由進士授延平令奉使遼北稱職歸擢處州刺史有惠政范仲淹歐陽脩咸以詩美之

高停肱七歲喪父廬墓悲思至和中郡上其事以孝行表門

陳茂元居母喪如禮旣葬廬墓太守崔愈躬顧其廬改所居鄉

曰孝行表於朝治平元年敕賜粟帛龍泉管師復表其母墓
祝亞元豐八年進士知閩縣不畏強梗大觀中以薦召爲太常
卿陞對詳切上嘉獎之官至中大夫

祝粹字子充元祐二年進士爲分水令有政聲民生子多以其
姓名之後坐黨禁復起終宣教郎

孫薪字至豐元祐中以明經擢荆門軍教授不赴絕意仕進與
黃葆光爲太學舊遊宣和六年黃以侍御史出守處州知薪
不屑就謁約會於洞溪僧舍贈詩云勸農因到好溪頭把酒
相看憶舊遊三十年來如一夢可憐空負釣魚舟時有里胥
欲賂黃而無由思因薪納之屬其家僮導意薪逆叱之曰噤
若口毋令吾坐入耳臙卒年八十

應恕字仁仲學者稱艮齋先生朱子嘗以老友呼之其所與論
學書一論大學中庸一論禮書一論易本義且云尙恨聞見
淺薄望賜誨諭勿使有待於後世子雲其見重如此恕寓居
台州故亦傳爲台人云

楊富老七歲喪父葬於蘇術塢廬墓三年墓木生連理烏鵲來
巢紹興中太守葉顥奏於朝詔賜粟帛錄付史館

祝庭字邦直年十四入太學紹聖四年進士屢持使節明敏有
聲官至中大夫衛尉少卿子鎰舉賢良

周智字惠卿六歲喪父廬墓有紫芝一莖七葉之異郡守以聞

會成均試士以商山節婦麗水孝童爲問徽宗覽之命編入時政記高宗朝鄉老上其行賜出身終從政郎嚴州建德丞吳詳字守約崇甯間爲蘇州教授高簡自持時中貴人朱勔以花石綱住蘇州勢燄薰灼有司脅息奔走如屬官詳未嘗往見及爲福建路茶司提舉以廉名著入仕四十年無一椽以庇風雨子祇若登紹興十五年進士

周奇九歲喪母臥墳側二年有赤雀十數巢其旁馴擾近人崇甯中詔賜粟帛

趙文澤六歲喪父廬墓有羣鼠銜花白鵲來巢之異郡表於朝大觀初詔賜帛五十疋

祝顏字景深以八行貢太學大觀三年以舍選登進士嘗試孟軻勇於義賦爲時傳頌號祝孟子終宣教郎

梁汝嘉字仲謨

案神道碑謨作謨

處州麗水人以外祖大宰何執中任

入官調中山府司議曹事建炎初知常州武進縣守薦其治狀擢通判州事加直秘閣歷官至轉運副使臨安闕守火盜屢作命汝嘉攝事汝嘉脩火政嚴巡徼盜發輒得火災亦息遂命爲眞加直龍圖閣以稱職擢徽猷閣待制試戶部侍郎兼知臨安府累遷戶部侍郎進權尙書兼江淮荆廣經制使汝嘉素善秦檜殿中侍御史周葵將按之汝嘉聞給中書舍人林待聘曰副端將論君待聘亟告檜徙葵起居郎葵入後

省出疏示待聘曰梁仲謨何其幸也待聘始知為汝嘉所賣

士大夫以是薄汝嘉汝嘉求去以寶文閣直學士提舉太平

觀未幾升學士知明州兼浙西沿海制置使歷溫宣鼎三郡

復奉祠以歸紹興二十三年卒汝嘉長於吏治在臨安風績

尤著

宋史本傳（周必大梁公神道碑）公諱汝嘉字仲謀幼敏悟外王父清源郡王何丞相執中奇之奏補登士郎

知武進縣己酉二月六飛南渡次常州官吏駭散公獨不去上
異之顧大將張俊刻姓名於御劍九月加直秘閣增埤濬陰
為賊備既而虜騎大至部民數萬倚公安集紹興二年春除兩
浙轉運判官又陞副使兼權臨安市皆茅舍數火公始以陶瓦
易之三年七月進直龍圖閣正知府事虜遣使來適殿柱壞詔
亟葺治公心計有餘凡梁柱竹木瓦石用度丹漆皆度廣狹高
下素為儲備一日告成上自宮省下至營屯及百司官廨區處
悉有方始成都邑上諭公曰前政宋輝俗而懶盧知原謬而執
今得人矣次年進戶部侍郎仍兼臨安府六年上幸金陵為隨
駕都轉運使八年駕還金人議和樞掾胡忠簡公銓上書得罪

麗水縣志

卷九

人物

四

麗水啓明印刷所代印

公與侍從六人同對謂虜情難測後必背盟禮不可過又言責
銓大重奏稿多出公手當路始不樂諷言官排擊公力求去秩
十年起知川陝都轉運使公前謂虜必渝平懇辭已而果然東
京留守孟庾降上謂侍臣曰庾不可任惟梁汝嘉為朕言之十
一年陞寶文閣學士上嘗密以千字號付公有所見勿拘遠近
實封直達公感激恩遇知無不言前後條上便宜如分命諸將
控扼要害收陝西戍兵以固全蜀謂歸正人不當遣至謂措畫
失宜為諸將所輕願出睿斷毋失事機胡世將難以任用宜擇
人副之又乞分大軍為三一據地利一往來策應一留視營寨
使虜常為客我常為主又奏用張俊韓世忠岳飛為西府劉錡
守荆南皆為恢復進取之計踰歲請祠歸明年秋知溫州十六
年正月移知宣州乞奉祠從之二十一年起知鼎州再歲復引
疾奉祠二十四年十月二日薨於里第明年丁酉十月葬松陽
縣惠洽鄉之原公識慮絕人行以忠信內更劇曹外歷八郡位
未滿能亦弗克壽議者至今惜之（括蒼彙紀）汝嘉居鄰郡學
捐基以創齋廬至今繪像於學春秋祀之在戶部時朝議以國
用不足欲拘刷郡縣養士餘糧以助軍需汝嘉奏言學校者風
化之原不可一日廢也乞申飭有司凡贍學錢糧不得輒更拘
刷上可其奏子叔玠知郴州季瑒歷知信州光州湖北江西提
舉官至吏部侍郎江西俗多不舉子季瑒為創慈幼院置田收

養所至惜公帑不妄費行部恐擾州縣不宿城市嘗曰吾以清白遺子孫丞相謝深甫稱之曰真廉吏也叔玠子銛錯最知名銛乾道八年進士錯紹熙元年甲科第六人季秘子鑰朝散大夫知興國軍案咸淳臨安志紹興三年七月梁汝嘉知臨安府首繕庠序以示風化上自宮省下至營屯及百司官廨區處悉有方始成都邑上諭之曰云云與碑正同則碑載事績殆非虛美惟史言其附秦檜碑言其阻和議圖恢復則大相刺謬矣時代懸隔難以臆決兩存之以俟論定

季洞字虛中政和八年進士耿介寡合無所附麗睦寇洪載陷郡父沒於寇洞隨官軍進勦翦其仇官至泰州通判

胡升字子上工詞章初任彭澤丞終湖北提舉紹興初郡守耿延禧創譙門乞譔上梁文并記刻石畢以錢十萬酒百壺饋之辭曰升雖貧終不爲一譙門所鬻

吳安國字鎮卿處州人太學進士累官遷考功郎官以太常少

麗水縣志

卷九

人物

五

麗水啓明印刷所代印

卿使金 金人渝盟拘留脅服之安國毅然正色曰我首可得我節不可奪惟知竭誠死王事王命烏敢辱金人不敢犯

遣還後知袁州卒

宋史本傳 (案)宋濂括蒼吳氏系碑銘安國父庠官處州遂占籍子邦彥歷官知

吳縣復居德清又安國從子邦本一名挺字挺才以淮南東路安撫使司準備將領同司農少卿湯碩使金亦不屈節

姜綬處州麗水人金人再犯京師內外不相聞朝廷募忠勇士齎蠟書往南京總管司調兵赴援綬以忠翊郎應募乃剖股藏書縋下南壁爲邏騎所獲厲聲叱罵遂被害建炎中州上其事官其子特立承信郎

宋史本傳 (括蒼彙紀)綬宣和中平睦寇有功補承節郎

姜特立字邦傑麗水人以父綬恩補承信郎淳熙中累遷福建路兵馬副都監海賊姜大獠寇泉南特立以一舟先進擒之

帥臣趙汝愚薦於朝召見獻所爲詩百篇除閤門舍人命充
太子宮左右春坊兼皇孫平陽王伴讀由是得幸於太子太
子卽位除知閤門事與譙熙載皆以春坊舊人用事恃恩無
所忌憚時人謂曾龍再出留正爲右相執政尙闕人特立一
日語正曰帝以丞相在位久欲遷左揆就二尙書中擇一人
執政孰可者明日正論其招權納賄狀遂奪職與外祠帝念
之復除浙東馬步軍副總管詔賜錢二千緡爲行裝正引唐
憲宗召吐突承璀事乞罷相不許正復言臣與特立勢難兩
立帝答曰成命已頒朕無反汗卿宜自處正待罪國門外帝
不復召而特立亦不至甯宗受禪特立遷和州防禦使再奉

麗水縣志

卷九

人物

六

麗水啓明印刷所代印

祠俄拜慶遠節度使卒

宋史本傳（案）特立詩有唐賢風格在南宋尤爲錚錚所著梅山集四

庫書著錄而惜其名在佞倖彙紀書官資而略事蹟蓋諱之也今備錄史傳使瑕瑜不掩云

梁孚將宣和間睦寇方臘犯郡境孚將與兄孚光弟孚錫孚惠
糾合懿德宣慈應和三鄉義旅戮力禦之賊將洪載逃去郡
聞於朝會衢寇倪從慶嘯聚朝廷召孚將兄弟勦之事平賞
以爵孚光以讓孚將授迪功郎後人於宣平境內建裡德祠
祀之

祝汝秩字君禮宣和中睦寇擾諸郡汝秩詣闕上書乞爲討賊
先鋒補承信郎卽領兵解郭太尉圍破仇道人洞復至台州
捕臘餘黨爲賊所害

李棠字仲庇宣和中貢太學操履端潔爲後學矜式官至殿中
侍御史年九十餘終

何紱字叔章靖康初金人犯汴詔募義勇紱率豪健百人應募
補進義副尉至穎上連戰馬奔爲枯木所支遂沒於陣

祝永之字樗年以世賞授和州尉靖康初金人入和州守令俱
遁永之獨部鄉民城守州人就推爲守後知滁州

祝公明處州麗水人太原府孟縣主簿靖康間金人犯河東令
棄官去公明攝縣事率保甲入援圍守踰年城陷不屈死子

陶爲唐州司戶中原失守陶亦死官所建炎中贈公明承事

郎宋史本傳（案）明成化八年陳音
重建忠節廟記云建炎初諡義烈

麗水縣志

卷九

人物

七

麗水啓明印刷所代印

周格處州人直秘閣浙西提刑建炎元年討叛卒陳通與子肇
不俱遇害高宗嘉其節贈官敕葬

章雲就建炎四年潰兵宮儀破婺州將逼郡境州將募能說之
者雲就應命往遇於荆坑喻以禍福賊許諾與俱至城下會
官軍掩襲賊以爲賣己殺之子駒登紹興十八年進士

閻邱昕字逢辰爲義烏令以薦除監察御史累遷吏部侍郎給
事中以敷文閣待制知温州有薛某者秦檜親黨也爲郡丞
承檜旨俾造漆器昕不從薛怒諷檜黜之昕嘗憤權臣專政
作周易二五君臣論以排之平生不殖產至無宅可居旣卒
太守馬光祖建祠祀之扁曰清風後鄉人趙崇潔官太常陳

詞請諡太常博士趙崇璠議曰孟子稱富貴不能淫貧賤不能移威武不能屈此之謂大丈夫所爲言官爲給舍爲選部以獎廉靖惜名器爲先務故不爲權勢所撓真可無愧於孟子所謂大丈夫者矣諡法臨官潔正曰清壹德不懈曰簡請合二美以易昕名考功郎官洪勳譔覆議請如太常奏諡清簡

周汝明字舜卿紹興元年進士知德興縣有余學詩者以分財訟兄汝明署其牘云旣名學詩必識棠棣學詩愧服後知韶州

林覺字大任紹興間爲戶部侍郎奏減民間夏稅丁鹽綱絹仍

乞第五等戶折納見錢又以鑄錢精巧詔除敷文閣待制六孫各通一經四孫復中乾道二年進士廣東提舉知惠州梁安世字次張紹興二十四年進士過目成誦與張孝祥爲忘年友淳熙間自大農丞出知韶州遷桂林轉運使所著有遠堂集

王源父大方紹興中任江西安撫司卒源方九歲扶櫬歸葬於鄉之梅村墓廬哀毀癯瘠服闋父老列狀於郡郡守謝伋奏於朝賜粟帛宣付史館

王信字誠之處州麗水人旣冠入太學登紹興三十年進士第試中教官科授建康府學教授丁父憂服除進所著唐太宗

論贊及負薪論孝宗覽之嘉嘆不已特超兩資授太學博士時需次者例徙外添差溫州教授郡饑疫議遣官振救之父老願得信任其事守不欲以煩信請益力信聞之欣然爲行徧至病者家全活不可勝紀差敕令所刪定官法令有不合人情自相抵牾得以傳會出入者悉釐正之轉對言敵情不可測和議不可恃今日要當先爲自備之策又論太學正錄掌規矩之官而員多博士掌訓導之官而員少請以正錄兩員升爲博士從之論除官胥冗之敝乞精選監司而擇籍名郡將代半歲乃注人上親以其章授宰臣行權考功郎官蜀人張公遷初以年免銓至是改秩吏妄引後令柅之信鉤考

其故吏怖服有三蜀士實礙式吏受賕爲地工部尙書趙雄蜀人也以屬信信持弗聽已而轉吏部閱審成牘撫掌愧嘆嗟激不已以聞於上他日上謂尙書蔡忱曰考功得王信銓曹遂清邏者私相語指爲神明武臣給告不書年齒慶轉蔭薦肆爲姦欺不可控搏爲摘最者數事告宰相付之大理獄事連三衙殿帥王友直銳爭之上審知其非沮之曰考功所言公事也汝將何爲獄具者伏辜因請置籍以柅後患授軍器少監仍爲考功郎官丁母憂吏哀金殺牲禱神願信服闋毋再爲考功旣起知永州入奏事留爲將作少監復考功郎官轉軍器少監兼右司郎官升員外郎有以疑獄來上者信

反復披覽常至夜分升左司員外郎轉對論士大夫趨向之
敝居官者逃一時之責而後之禍患有所不恤獻言者求一
時之合而行之可否有所不計集事者以趣辦爲能而不爲
根本之慮謀利者以羨餘爲事而不究源流之實持論尙刻
薄而寢失祖宗忠厚之意革敝類煩碎而不明國家寬大之
體因循玩習恬不爲怪願酌古之道當時之宜示好惡於取
舍之間使天下靡然知向而無復爲目前苟且之徇又論朝
廷有恤民之政而州縣不能行恤民之實近歲不登陛下軫
念元元凡水旱州郡租賦或蠲放或倚閣住催然倚閣住催
之名可以並緣爲擾願明與減放又論豫備三說收逃亡之

卒選忠順之官嚴訓練之職又言屯田利害上皆納其說兼
玉牒所檢討官提領戶部酒庫久之上諭信曰知朕意否行
用卿慮書生不長於財賦故以命卿果能副朕所委爲中書
門下檢正諸房文字遷太常少卿兼權中書舍人假禮部尙
書使於金肄射都亭連中其的金人駢曰尙書得非黑王相
公子孫耶謂王德用也信得米芾書法金人寶之歸言金人
必衰之兆有四在我當備之策有二上首肯之太史奏仲秋
日月五星會於軫信言休咎之徵史策不同然五星聚者有
之未聞七政共集也分野在楚願思所以順天而應之因條
上七事有言陛下卽位之初經營中原之志甚銳然功之所

以未立者正以所用之人不一其人不一故其論不一其論不一故其心不一願豫求至當之論使歸於一鎖闥職封駁而右府所下不關中書或斜封捷出左於公論統領官奴事內官坐謫遠州幸蒙赦還而遽復故職潛藩恩舊之隸徒權酷官而齒朝士老禁校僥冀節鉞詭計可得之而奉稍恩典與正不異閤門多溢額祇候妃嬪進封而冒指他姓爲甥姪旣一一塗歸有雖書讀而徐核其不當者續爭救之上曰事有不可不問者第言之無有不爲卿行者於是益抗志不回宦者甘昇旣逐遠之矣屬高宗崩用治喪事人莫敢言昇俄提舉德壽宮信亟執奏舉朝皆悚翰林學士洪邁適入侍

上謂之曰王給事論甘昇事甚當朕特白太上皇后聖訓以爲今一宮之事異於向時非吾老人所能任小黃門空多類不習事獨昇可任責分吾憂渠今已掃迹居室尙不能有豈敢蹈故態以是駁疏不欲行卿見王給事可道此意信聞之乃止遇事剛果論奏不避權要由此人多嫉之信亦力求去提舉崇福宮詔求言信條十事以獻其目曰法戒輕變令責必行寬州郡以養民力修軍政以待機會郡當分其緩急縣當別其劇易嚴銅錢之禁廣積聚之備處歸附之人收逃亡之卒起知湖州信未涉州縣據案剖析敏如流泉擢集英殿脩撰知紹興府浙東安撫使奏免逋官錢十四萬絹七萬匹

綿十萬五千兩米二十萬斛山陰有獫狫湖四環皆田歲苦
潦信創啟斗門導停瀦注之海築十埧化匯浸爲上腴民繪
象以祠更其名曰王公湖築漁浦隄禁民不舉子買學田立
義冢衆職脩理加煥章閣待制徙知鄂州改池州初信扶其
父喪歸自金陵雖疾風甚雨弗避也由是得寒濕疾及聞孝
宗遺詔悲傷過甚疾復作至是寢劇上章請老以通議大夫
致仕有星隕於其居光如炬不及地數尺而散數日信卒訓

其子以忠孝公廉所著有是齋集行世

宋史本傳（括蒼彙紀）信守紹興日置田

瞻學及居里又捐己田歸郡學養士至今繪象於學春秋祀之弟仁紹熙元年進士官至太常寺丞知衡州仍淳熙十四年進士何右科伋倚特科子驎知郴州駒知嘉定府會吳曦叛能脩戰守備曦平以功再任驎之子琮右司郎官知江陰軍（案）史

麗水縣志

卷九

人物

十二

麗水啓明印刷所代印

傳本洪邁所撰信墓誌而多有訛脫今據石刻正之石刻亦闕蝕過半不能盡通詳見括蒼金石志又案舊處州府志於信事多所刪落而載其揚州瓊花詩以爲天下傳誦厲鶚宋詩紀事因而錄之其詩鄙俚已甚未必果出信手也今削

葉宏字夢祥乾道九年射策中乙科疏論州縣征賦及軍官黜陟之弊上納之除武學博士乞增置生員備他日用上以兵家書傳寫多訛舛出禁本十一家註孫子詔宏撮要剪繁爲善本書成賜銀絹遷國子監丞出知均州以忤上官去尋除大理丞累擢太府少卿總領淮西軍餉七年選使脩好於北上特簡宏任之至安肅馬蹶傷臂副見其病且恐示弱以爲言宏曰苟君命不委於草莽雖以尸將事可也彼折臂三公何人若乃弱視我乎比禮成無所屈旣還益出賜予犒軍以

時訓練戎政脩舉會中飛語請祠歸慶元元年以習軍事卽家起知楚州州薦饑民多流亡剽掠宏安集有方並淮千里無警朝廷材之加直敷文閣除福建轉運副使命甫下疾卒盧彥德字國華知廣德軍建平縣舊籍有絕戶物力錢抑民代輸縑匹民苦之多逃亡彥德至大搜隱漏所入三倍於舊遂以充賦削虛戶二千有餘逃者復歸兩守蜀郡再歷憲曹並著聲績召爲戶部郎官除福建轉運判官至朝請大夫

郭泰亨字亨甫淳熙八年進士呂祖儉詆權相韓侂胄貶韶州泰亨素善祖儉贖其行坐黨禁解授清流縣令多士祠而碑之擢臨安府城南都廂時史彌遠當國有上書忤其意者

繫獄委官鞫問泰亨辨其無罪彌遠怒遂致仕

潘叔豹字仲虎淳熙八年進士知萬州與魏了翁爲道義交時有僧窖地匿民婦叔豹發其奸置諸法子杞嘉定元年進士官至太府寺丞孫垕嘉熙二年太學奏名垕子應發咸淳三年鄉薦著筆志三卷

林椅字奇卿紹熙元年進士爲紹興府教授淹貫經術以周禮爲周公經世之書乃民極所由立隨類條列之名曰周禮綱目翰林學士樓鑰禮部尚書倪思表進其書除刑工二部架閣

葉禔字天祺任上饒縣簿時馬光祖守建康兼江東安撫使辟

至幕府多所贊畫提學問該博文詞典瞻華登雲梁椅朱天
民吳楊皆出其門

蔡仲龍字子奇嘉定十六年進士宅心平恕不爲高論郡守欲
遷州社仲龍曰苟無大故不必變置守服其識後以大理少
卿出知信州

吳思齊字子善處之麗水人祖深有奇才永康陳亮以子妻之
遂僑居永康父邃武學博士官至朝散郎知廣德軍思齊由
任子入官監臨安府新城稅調嘉興縣丞攝縣事縣獄多留
繫思齊坐獄戶讞問凡株連疑罪悉簡出之郡有盜殺其黨
獄蔓延不決下思齊議思齊曰盜攘盜貨與民殊科久獄不

斷者由吏教囚以贓累民耳若正其殺人罪置寄贓不問則
得矣洪起畏守鎮江檄入幕府起畏議築城思齊諫曰京口
以長江爲天塹城之何爲徒厲民耳賈似道喪母上將以太
常鹵簿臨其喪禮部侍郎文及翁欲上疏言懼禍且中止思
齊曰叱嗟而母婢也公不可默也未幾遷饒州節制司準備
差遣監察御史俞浙以論謝堂出爲太府少卿留夢炎當國
言堂有勳籍浙劾之過思齊曰公宅百揆畏一家而屈臺論
天下其謂何似道丞相堂貴戚思齊以小官中其諱惡人爲
危之思齊弗顧也俄請監南嶽廟流寓桐廬值宋改物有勸
之仕者謝曰譬猶處子已嫁不能更二夫也先墓在麗水不

能數歸省歲時必遙望隕涕因自號全歸子誓不失身以病
父母也大德辛丑卒所著書有左氏傳擬周公瑾平荊州碑
魏司馬孚贊濂游浦陽仙華山見其石壁題名尙隱隱可辨
故老云思齊與方鳳謝翱游酒酣氣鬱時望天末慟哭至失
聲夫以氣節不羣之士相遇於殘山剩水間奈之何而弗悲
哉

宋文憲集

吳思齊傳

梁椅字子奇嘉熙二年進士時甫弱冠蚤脫場屋遂得潛心講
貫力於爲文晚歲慕程朱之學編輯遺論名曰論語翼除太
常寺丞權禮部郎官

俞來字舜咨太學詞賦有聲官至國子錄

麗水縣志

卷九

人物

十五

麗水啓明印刷所代印

趙孟璋字子通淳祐中任武康丞有盜誣善良爲黨令長欲坐
之孟璋力爭不得遂拂衣歸隱居橫塘以老

朱天民字覺甫景定三年進士婺州東陽尉攝金華義烏東陽
三縣皆有聲再任浙西安撫司僉廳以禮法繩貴戚風采凜
然除平江府節度判官

葉夢登字天游博學多識以文鳴嘗哀輯諸儒論史精語爲一
編名曰通鑑發揮中景定三年進士爲吉安教授

吳梅字仁伯師北山先生何基基教以真實堅苦所著書曰四
書發揮參質於魯齋先生王柏註浦江縣尉改錢塘

華登雲字南伯咸淳元年進士任錢塘尉尉司在西湖近平章

賈似道府似道好苛察尉輒以譴去登雲獨久於其職以治
聲聞

葉應光咸淳中母王氏病革應光夜半然香禱天俄有鳴鳩飛
墮應光取烹和粥以進母病卽愈元至元間耆老舉其父子
孝行本路申達表其門

朱上交安貧樂道善行著於鄉里郡聞於朝詔徵不起賜號養
素先生

王嚴字敬之少負俊才善詞賦咸淳末以宣慰李公薦授官固
辭不拜恬淡終身嘗捐資砌浮雲 二鄉石衢四百餘丈
人多德之

黃國華字叔文方嚴好禮終日衣冠危坐歲歉必賤糶以活民
或大雪有不舉火者輒遺之德祐間惡少羣聚爲盜包氏族
最强號包家洞林某能搏虎號林大將劫掠旁郡吏莫敢制
惟憚國華不犯境一日方殺牲盟里橋國華適過之因出金
帛曰汝等以貧故爲不義以此助汝何如衆慚而去國華追
與之所居曰弱溪元兵下處州右族爭避患其中重貨山積
聞兵猝至委之而去居人欲攘所有國華命左右收貯一室
事定召其主悉歸之

劉夢求工術數未嘗爲邵氏學而知人休咎如燭照術行於三
衢遂爲衢人士大夫過衢者以不問夢求易卦爲恨永康陳

亮爲文以張之

元

王淮字玉淵博學美容儀嘗受業於石塘胡先生大德間授瀏陽州教授歷松江路判官

郭良知號稼圃博學通經文章道德爲時所宗

陳繹曾字伯敷處州人爲人雖口吃而精敏異常諸經註疏多能成誦文詞汪洋浩博其氣曄如也官至國子助教論者謂

與陳旅相伯仲云

元史陳旅傳

吳仲元以文學世其家爲本路儒學教授

鄭謹之字有常性切直能面責人過而聞人一善咨嗟嘆美逾

麗水縣志

卷九

人物

十七

麗水啓明印刷所代印

於在己里居授徒從者常數十人自號似山隱居後以薦授

龍泉教諭調建康學錄改獨峯書院山長秩滿致仕授將仕

郎處州路儒學教授食半祿至正二年卒

王元泰字長卿善易訓導郡庠子仲成獨峯書院山長姪景行通春秋經訓導郡庠

周濬字深伯少有志操延祐間仕潭州路經歷陞象山縣皆以廉著

林定老字君則延祐五年進士除奉化同知遷興化路通判陞新州守皆有政績子彬祖至正五年進士嗣祖以詩經魁浙江孫公慶亦領鄉薦

潘弼字良輔由教官選廣東廉訪司照磨公廉律已發奸摘伏如神爲勢要所忌改除贛州路司獄未嘗改其操焉

項棣孫字子華以薦爲青田教諭至順元年登進士授同知奉化州事調福州路總管府推官改興化路莆田縣尹轉知福清州事丁內艱不赴尋提舉泉州市舶司事秩滿歸攝本州貳守累階奉直大夫同知延平路總管府事會朝廷遣重臣李國鳳經略江南承制陞棣孫本路總管兼防禦事歲餘致仕隱居青田萬藏山棣孫在奉化時州民以四月八日飯僧棣孫惡其男女無別嚴禁之在福州有海舶列旗幟金鼓以備不虞仇家誣爲亂已簿錄其家棣孫白之活者數百人有

周生者以鍊金惑衆衆指爲神仙出入公府莫敢何問棣孫縛而罪之在莆田俗悍少恩有忿爭輒搯小兒吭斃之陷人於罪棣孫召耆艾婉諭之風頓革在泉州丁儉歲守卒出掠至殺人棣孫白郡守發粟振之郡以安至正十三年福安諸縣奸民林君祥等招江西妖人數萬圍福州廉訪使郭興祖檄棣孫集義兵往援棣孫部署有法寇恐夜遁去其攝貳守時青田寇吳德祥據險阻官兵時失利棣孫佐大帥城守仍遣其婿祝彥方往諭之德祥歸所執縣尹葉伯顏縣尉薛徹徹禿詣大府請降棣孫爲政簡易一以愛民爲本不求赫赫名至忠義大節持之甚力至正二十六年卒

(案)宋濂項君墓銘載其事如此

所云伯顏者卽葉琛別名也而宋集中復有葉治中歷官記咸稱琛禦賊功初不及棣孫一字故知歷官記非宋筆也

葉元灝字子西學以聖人爲宗雖盛暑必衣冠而處事親存歿咸中禮其友項棣孫語人曰生事葬祭求無愧古人者惟吾子西耳家貧殺衣縮食葬宗黨十餘喪講授弟子數繹奧旨

初無倦色士大夫慕之稱爲樂隱翁

（案）葉夢得之入栝乘前人屢糾其違然宋濂葉

府君墓碣以元灝爲石林十世孫且云葉氏宋初自松陽卯山遷麗水東里至贈檢校少保夢得始以經學著云云豈括故石

林祖貴歟

附識俟考

陳桂芳字悅理授徒鄉校師嚴道尊隱德不仕

王興祖字君起博學好古後進師之隱居不仕

葉熙字敬仲通春秋學嘗爲教官歸隱不出

麗水縣志

卷九

人物

十九

麗水啓明印刷所代印

吳文煥字國光精春秋學隱居終身號小栝山人

黃許字與可志聖賢之學善談古今事得失至正中天下無事許獨憂以爲且大亂著書十篇言政治闕失曰亟用吾言庶可救後將無及上之宣撫使者不用後亂作李國鳳經略江南見其書辟之不起卒年八十著有四書類觀易大意書總斷又哀制度文爲之說爲文通若干卷初許守母墓廬於石壁下遂號石壁山人云

季仁壽字山甫重紀至元初以薦爲慈溪教諭列狀大吏祀鄉先生黃震於學設課試法以鼓舞後進秩滿遷松陽訓迪如慈溪改饒州雙溪書院山長以親老辭李國鳳經略江南承

制起婺州教授堅辭之肥遯以終自號春谷處士初仁壽父
德巽治易春秋有名仁壽承家學通其奧義及上饒鄭原善
來爲郡錄事仁壽從受詩書二經所造益精學者稱四經師
爲文詞能自成家余忠宣公深賞之所著曰春谷讀書記易
書詩春秋衍義四書質疑策樞通覽詩林鈎元弓冶錄春谷
文集兵燹後罕有存者宋濂銘其墓深致惋惜云
(案)仁壽見龍泉縣志
今考宋景濂季公墓銘云其先龍泉人徙居州城中
則爲麗獻矣府志有魯德巽子仁壽誤季爲魯也

劉演字浩卿有文學美容儀受經於錄事玉山鄭明善得其傳
至正初起爲義烏教諭後署明善書院山長子彬明洪武初
官工部員外郎

麗水縣志

卷九

人物

二十

麗水啓明印刷所代印

林森字君度積學敦行爲後進模範不樂仕進年九十餘卒

葉登龍字梅林博學明經講道授徒著有周易記

梁載字遜耕通經博學著元處州路志姪琪 珪以文學世其
家

陳康子字景邵著通鑑節要刊於郡庠

葉烜號高溪善詩有和陶集

葉浚字仲明學通諸經工詩著有石山樵唱集

陳鎰字伯銖典教松陽善詩著有午溪集

陳鑄字叔鼎幼喪父力學通經至正間以德行授金華照磨未
期謝歸事寡嫂盡禮推腴田與之鄉人無力喪葬者出財佐

之洪武初劉基胡深欲薦之因哭母喪明不果

楊顯文由儒士任本學訓導輕財樂施陞武康學教諭

吳宗文自號野齋通春秋經隱居西山鄉人高其行誼稱曰野齋處士

何清臣字學可通春秋經誠意伯劉基師之

俞杰字仁仲授將仕佐郎處州路儒學教授嘗輯先儒論說爲
論語訓蒙

王鍾字彥中爲宋給事信之後與弟錡孿生及長俱好學能文
詞至正十三年以春秋經魁鄉貢力學得疾閱四年卒鎮帥
石抹宜孫弔之以詩青田劉基爲文以哀之

王坦字子明其先由會稽徙麗之玉溪宅心夷坦善與人交州
閭及士大夫咸敬信之常曰士生不獲罪戚黨得自娛邱壑
足矣寵榮權利非吾願也疾革命其子毋厚葬毋用釋道士
青田劉基銘其墓

趙德懷名古臯以字行嘗受經於林彬祖博學有識以古文鳴
宋濂推之復稱其爲人恂恂樂易溫其如玉云

吳嗣英字華叔安國從孫父邦本皆使金不屈者也邦本侍父
疾遂精於醫嗣英繼其學不要利內外嫻窳者傾資給之歿
不能葬亦藉以襄事愛城北三巖幽邃豫爲藏穴於山麓時
醉臥其中築歸愚庵於前屬其友何宗姚曰若爲我墓碣幸

得生見之某年月日吾當窆此耳至期果然官至迪功郎
吳祖繼一名元亨字嘉甫於經史百氏書無不研究親歿負土
成墳廬居於側服闋始還室屢燬於火必先完諸弟者弟有
孤女二人厚嫁之性耿介獎善疾惡無少詭隨赴愬者得片
言咸悅服去人謂有漢陳實之風私謚嘉靖處士云
俞涑字巨川世饒於財而敦厚積弱有科繇隸卒蹈門畏之如
虎狼多寡惟所欲涑長遇事立辦有急奮身見官長自白吏
不能爲奸利鄉里賴以安輯涑外剛明而內慈惠弟邁風癩
疾憂之如在己召醫劑藥必躬親之弟沒撫其子尤有恩意
鄉鄰之孤嫠貧病者恤之惟恐不及云

趙友桂字詵仲一字國芳爲宋恭憲王元佐十二世孫於學無
所不究尤精天官律歷爲詞章溫潤爾雅中山李桓少推許
顧稱友桂典奧不羣友桂亦高自矜詡不可一世獨善臨海
舒卓談輒徹夜或大號墮幘人目爲狂生就試屢被黜隨父
宦金陵遭亂警讐得疾卒年僅三十有三所著書有夏小正
解詩書易諸錄辨南客稿宋景濂銘其墓曰南明之西有氣
吐霓化爲龍文上貫少微蓋深悼之也
梁天民思親廬墓將終身焉其友劉基曰廬墓非古也然人子
有不能已而自我爲之君子不非焉乃作梁孝子廬墓詞表
其哀思焉

魏朴字復古世饒於財居近通濟渠凡旱澇濬修朴率輸金爲倡至正十二年閩寇自浦城侵龍泉朴以家財募兵禦之王府參軍胡深授朴管軍千戶守禦保定事平遂除稅課局副使禁胥吏苛歛有廉能稱以憂去終喪墓廬明初以賢良徵不起

祝子和幼以孝友著稱既長度不能隨時俯仰絕意仕進嘗一遊淮浙間士大夫重其文雅爭延致之俄歸里門築室曰梅所度書萬卷與賓朋觴詠其中治家有法喪葬皆遵古禮至正五年卒

潘堯夫字季雍英敏博學尤工書元末山寇剽掠堯夫出私財

麗水縣志

卷九

人物

二十三

麗水啓明印刷所代印

募丁壯守禦鄉里多其功明初鎮帥欲授以官以親老辭自號無知老子晦迹以終

明

葉琛字景淵麗水人博學有才藻元末從石抹宜孫守處州爲畫策捕誅山寇授行省元帥王師下處州琛避走建甯以薦徵至應天授營田司僉事尋遷洪都知府佐鄧愈鎮守祝宗康泰叛愈脫走琛被執不屈大罵死之追封南陽郡侯塑像

耿再成祠後祀功臣廟

明史本傳

(案)宋文憲集序葉治

甚備府志所載則互有詳略而葉氏譜牒載宋文浮於本集者幾二千言或謂譜牒者爲初稿集中者爲定本府志則從初稿掇拾者也今考文憲集中多有僞作無論此文體質穉弱不類文憲卽其稱琛攝處州總管府同知時於至正十五年十月賊

持刀槩自懸庭擁琛至黃壇山寨至次年四月送還州城首尾七閱月而一籌莫展去留生死一聽於賊殆一木偶人耳與史傳所云畫策平寇者何其戾也而猶復書賊體貌之恭供張之盛以爲榮幾於狂易失性矣府志以其不中情理意爲改竄覽者孰從徵信乎故辨而削之不使劣翰得污前賢云

葉現字景龍南陽侯琛之弟洪武初以薦至京明祖試以詩稱旨授通州勾管尋陞府判有惠政擢南雄知府築隄瀦水灌田萬餘畝人稱葉公陂永濂稱其飭己廉介操心仁恕後祀名宦

葉琮幼失怙恃叔母陳氏性悍欲逐之琮盡讓田宅別居而旦暮歸省如此者十餘年陳歿其子珣以田宅讓還琮雍穆無間焉

麗水縣志

卷九

人物

二十四

麗水啓明印刷所代印

任維平博究羣書至正己亥明師下金華與弟維信往見之太祖方御食命賦青瓷壺詩稱旨留語達旦俱授義兵萬戶維平辭不就後以所言皆驗再召授觀察使

李參字景參詞華敏瞻尤工於詩洪武初詣京師賦鍾山曉霽詩稱旨賜宴命需次錄用以母老懇辭歸家政甚肅三世不異爨有泉石稿若干卷

劉彬字宗文元季隱居不仕築室曰菜窩灌園自給明初應聘爲晉王府典儀轉官工部主事以力政著聞初金華宋濂游少微山植彬抱甕出汲叩姓名弗告而言灌事甚悉及起官濂遇諸朝乃次往時問答語爲抱甕子傳青田劉基亦爲補

作菜窩說焉

李維齊洪武中由太學試登甲科拜監察御史抗疏極論時政
調容縣知縣

王德均字志衡好禮樂道不干勢利明初屢徵不起隱居清趣
亭以終

賴原俗洪武間爲章邱丞蒞政寬裕潔已愛民凡公出量地遠
近裹糧而行遷戶部員外郎

俞廷芳洪武初由儒士知洧州招逋亡薄稅斂民甚德之又遷
縣治新學廟程度皆廷芳所定後官延平知府

祝崐幼隨母陳氏避亂山中猝遇賊母自投絕澗崐望見躍從
麗水縣志

卷九

人物

二十五

麗水啓明印刷所代印

之賊退鄉人迹之崐衣絰於樹不死母亦救治得全洪武七
年舉孝廉擢潛山知縣未幾陳情乞養歸

祝金字廷心資性純厚志學不倦師事宋濂由儒士任本府訓
導陞浦江教諭屢典鄉試所著有吟癡集祀本縣名宦

祝定字伯靜以醫鳴洪武初授本府醫學提領轉正科註竇太
師標幽賦醫家咸宗之

徐用中嗜學工詩由秀才授遼府教授訓課生徒多有成立
吳廷桓洪武中舉明經任王府紀善有百韻梅花詩詠史詩槐

溪吟稿著於時

楊仲吉洪武中辟至京師上問在家何爲對曰春耕夏耘秋收

冬則教子讀書通義理特授崖州知州及歸惟衣被而已

王廉字希陽洪武初薦入翰林修史書成授太子說書官至陝西左布政使廉博通經史尤精於易所著有芟山集迂論史纂南征錄四書詳說又善琴工篆隸

劉宗保博學能文元世任青田縣石門書院山長洪武初任本府儒學訓導

趙可久博學能文洪武初由儒士任廣東左布政使

潘初以明經授慶元學訓導號介軒有雉足稿

潘堯心字伯有學行美丰儀明初以明經秀才授王府錄事歷監察御史遷河南按察司僉事著有巢雲集三十卷

麗水縣志

卷九

人物

二十六

麗水啓明印刷所代印

黃池字伯生師事劉基文章器識爲時推重官秦府紀善著有石樓文集

鄭孟純多藝術尤精音律洪武初詔州縣儒學以雅樂釋奠頒其成書於天下時無知者孟純獨按音律教諸生上聞而嘉

之詔入成均與冷謙共定一代之樂

(案)府志不著孟純邑里考兩浙名賢錄作麗水

人

吳壽字子六洪武末由歲貢任監察御史左遷旌德知縣廉明有吏才民甚愛之

沈琇字廷潤居貧力學隱處山林工詩善歷算和而不同自號雙溪漁者

陳宗明任瀏陽知縣歷溧水皆有聲陞署廣東布政使致仕復起終於官

葉子曉字啟明善詩文甘窮約不受人餽遺曰無事而受非義也有司上其名徵辟不應

吳叔圭博學善文洪武中舉賢良方正不就隱居終身

王雋字叔英雅志詩書不求仕進所著有友梅集槐屋集

鄭玻字仲彩善文詞謙謹不欲上人有司以賢良方正薦力辭不就

黃夢庚字伯明兄夢池爲龍江宣課大使以入課鈔惡繫刑部獄夢庚走京師視之會有詔青罪無大小得輸粟邊郡自贖

夢庚欲鬻田往輸夢池曰鬻田父母何食夢庚曰兄獲免罪歸父母啜粟飲水無不樂者馳還家語其弟夢裴夢裴持券東西走貿白金予夢庚輸粟大同夢池得出

楊本處州人建文初以太學生應募授錦衣衛鎮撫使常操鐵棒馳陣所向披靡李景隆忌其功不與上白溝之戰請爲陣首景隆陽許而陰尼之諸將不繼竟無功本乃疏劾耿炳文李景隆不足將請自將以行不用後被擒燕王使繫北平獄趙王高燧恐其爲內應殺之燕王歸太息曰吾直困之耳奈何不爲吾儲良將

潘華永樂四年以舉人預脩大典七年中乙榜授直隸臨淮學

教諭十年奉敕入禮經館纂修歷任長汀南昌鎮江上饒諸學

吳允傳永樂六年被召預修大典授溇縣主簿致政歸自號栝山遺老有溇陰吟稿

陳炅字仲圖永樂十八年舉於鄉炅幼孤篤志養母遂絕意仕進郡守張佑周祺皆禮爲大賓最後郡守韓裴欲薦之不受年九十四終

吳政先名善才永樂十三年進士授行在禮部主客司主事謙謹自持克盡厥職洊陞本部右侍郎

周原慶永樂間由人材授程鄉知縣歷浦城江甯二縣皆著聲

麗水縣志

卷九

人物

二十八

麗水啓明印刷所代印

官至刑部郎中工畫尤善松石

俞英由舉人授兵部主事陞員外郎勤慎能舉其職孫俊字尚賢成化八年進士歷官南工部尙書英贈如其官

柳杲字寅賓謙謹好學由人材任處州學訓導得俸金悉以贍族後謝病歸身範家模多所垂法

王庶悅與弟庶康同居四十餘年內外無間言有地近學宮卽輸之學以擴其基士論多之

王存誠以儒士徵授上林苑典簿尋擢監丞栝山寇爲亂有指良民爲盜者存誠適回里遇於黃頭塢察其冤白當事釋之所活凡百餘人著有如愚集

趙初宣德間諸生家貧力學父卒苦無地以葬痛不欲生其友
吳伯昭割地與之初故毀瘠又躬親營築積勞而卒指揮牛
通憐之并其父葬焉

吳子聽以篤行孚於鄉有不平事往質之得片言立解宣德間
歲歉代鄉民輸課於官

薛道銘字宗永早工文藝後以爲末技棄去益務爲惇行尤善
事其兄事無大小必稟承之兄坐事逮繫請以身代不得則
傾資營救卒以免長里中徭賦勞役均而徵歛時不妄耗人
一錢恤貧拯患於宗戚尤有恩意永樂十八年卒以子希璉
貴贈刑部侍郎

薛希璉字廷器年十二爲諸生宣德五年成進士詔歸進學後
三年赴召觀政兵部拜貴州道監察御史負氣敢言正統五
年按治河南有時譽尋命巡京市蹋坊蹋坊者百貨所聚駟
驢窟穴爲商賈患上察希璉能故有是命不逾月權豪屏迹
會廷選憲臣分行天下舉備荒之政希璉直江西所至以便
宜剗姦弊廣儲蓄築陂塘通變盡利能聲益著事竣擢刑部
右侍郎六年畿內廣平等府旱蝗希璉往視蠲逋弛征天大
雨蝗亦旋息未幾往理鳳陽等處屯田宿弊一清軍民交利
十年巡撫直隸保定淮安等十一府事有不便者立罷之十
三年閩寇鄧茂七作亂逾年始克郡邑殘破命希璉鎮守其

地無何茂七黨羅丕復起希璉遣使宣諭宥其脅從降者數萬其逃入海者亦面縛自歸希璉因縱兵擊其渠擒斬殆盡以功陞刑部尚書鎮守如故景泰三年命大臣分行天下考察官吏希璉之山東罷黜貪鄙者二百五十餘人適旱蝗經營振貸活饑民百數十萬天順元年改南刑部二年卒初希璉鎮守閩中作五水寨五寨者福甯之烽火門福州之小埕澳興化之南口山泉州之浯嶼漳州之西門澳也後漸廢嘉靖四十二年倭事棘巡撫譚綸號知兵以五寨守扼外洋法甚周悉疏復之焉

(案)彭時撰希璉神道碑其紀事年歲與實錄間有不符合今正水寨事碑不載據明史

兵志及譚綸傳補

